



Rabu, 21 April 2021

Ogen: Kuan-kuanen 1:1-6



“Suratken ras Ogelah”



Ibas kitab Kuan-kuanen sipemena enda, tuhu ngajarken kerna sada kegeluhen si payo, pentar, mehuli, jujur, adil ras benar. Tujunna eme (ayat 6), mbages isipati erti si terbuni kerna kata Dibata janah sieteh njabab persoalen-persoalen si ibereken kalak pentar. Bas perdalamenta i tengah-tengah doni enda dem alu perbeben, seh kel kita perluna pengajaren si payo ras mehuli bagi si ibelasken bas Kitab Kuan-Kuanen si pemena enda. Erbage-bage kejahatan, erbage-bage penipuan ras kejahatan sidebanna mabai kita harus bijak ngalaken situasi. Tema bahan perenungenta sendah " Suratken ras ogelah," ngataken man banta pengajaren si enggo si dat kita e perlu rusur isuratken ras ulih-ulihi i oge. Seh maka kita jadi kalak pentar ngalaken kerina si terjadi bas doni enda. Pengajaren Salomo enda, tujunna e me nampati kalak gelah pentar dengen ngaloken pengajaren si mehuli, janah ngantusi ranan simbages ertina (ayat 2).

21 April si peringeti hari ibu Kartini, sosok diberu si erjuang i bas bidang pendidiken. Kerina diberu perlu melala erlajar, ngoge ras nuliskan kai si enggo ietehna. Diberu berhak ndatken pendidiken bali ras dilaki. Iajukna gelah kerina diberu erlajar gelah jadi kalak pentar. Kartini pe mereken usihen i bas nuratken kai si angkana, janah ikirimna man temanna i Belanda. Si isuratkenna e ibahan jadi sada buku judulna, 'habis gelap terbitlah terang.'

Kai si iperjuangkan Kartini enda terus min teridah i bas diberu ras pe Moria GBKP. Moria si mejingkat ngoge ras nurtaken kata Dibata bagepe pengalamen-pengalamen geluh si banci mereken motivasi ras semangat man enteren jelma. Jaman IT terus berkembang, ngajuk kerina Moria erlajar gelah pentar, nuratken pemeteh ras ngogekensa man teman. Alu ikuhi kata Dibata, kerina Moria ngasul makeken IT i bas kegeluhen.